

## সম্পাদকীয় ভূমিকা

গত বছরের নভেম্বর মাসে ‘সর্বজনকথা’র প্রথম সংকলন প্রকাশিত হওয়ার পর আমরা আশানুরূপ সাড়া পেয়েছি। তবে এখনো আমরা দেশে ও বিদেশে আগ্রহী ও সম্ভাব্য পাঠকদের হাতের কাছে এই জার্নাল পৌছানোর ব্যবস্থা করে উঠতে পারিনি। এ ব্যাপারে বন্ধ-শুভার্থীদের সহযোগিতায় বিতরণ ব্যবস্থার যথাযথ উন্নতি করতে পারব বলে আশা করি। বার্ষিক গ্রাহক কর্মসূচি ও আমরা শিগগিরই শুরু করব। আমাদের প্রতিশ্রুতি অনুযায়ী আমরা কোনো বিজ্ঞাপন গ্রহণ করছি না। অতএব, পাঠকদের সক্রিয় অংশগ্রহণই এই জার্নালের টিকে থাকার একমাত্র অবলম্বন।

দ্বিতীয় সংকলনেও আমরা গবেষণাভিত্তিক বেশ কয়েকটি লেখা প্রকাশ করছি। এ ছাড়া থাকছে সাম্প্রতিক ঘটনাবলি সম্পর্কে সংক্ষিপ্ত প্রতিবেদন। আমাদের আগ্রহ থাকা সত্ত্বেও চলচ্চিত্র, চারকলা, সংগীত, তথ্যচিত্র, গ্রন্থ পর্যালোচনা এবারও আমরা শুরু করতে পারিনি। আশা করি এই অভাব আমরা শিগগিরই পূরণ করতে পারব।

আগামী সংখ্যা থেকে আমরা মতামত বা চিঠিপত্র বিভাগ শুরু করব। আমরা এই বিভাগে ‘সর্বজনকথা’য় প্রকাশিত বিভিন্ন লেখা সম্পর্কে কিংবা দেশ-বিদেশের যে কোনো বিষয় নিয়ে পাঠকদের মতামত, জার্নাল সম্পর্কে সুপারিশ প্রকাশ করতে চাই। আমরা জানি দেশের বিভিন্ন প্রান্তে এমন অনেক ব্যক্তি আছেন, যারা হয়তো পরিচিত নন, কিন্তু গুরুত্বপূর্ণ বুদ্ধিবৃত্তিক কাজ করছেন। আমরা সেগুলো প্রকাশ করতে চাই। এটা হতে পারে গবেষণা, অনুবাদ, রাজনীতি, অর্থনীতি, সমাজ বিষয়ে নিজস্ব ভাবনা, নির্দিষ্ট এলাকা বা পেশা নিয়ে অনুসন্ধানী লেখা বা প্রতিবেদন, শ্রেণীগত-জাতিগত-ভাষাগত-ধর্মীয়-লিঙ্গীয় বৈশম্য, নিপীড়নের চিত্র, অন্যায়-নিপীড়নবিরোধী মানুষের চিন্তা ও লড়াই, দখল লুঝন ও পরিবেশ সংকট নিয়ে প্রতিবেদন ইত্যাদি। লেখার বিষয়গত গুরুত্ব এবং তথ্যগত সঠিকতাই আমাদের বিবেচ্য হবে। আমরা এ ধরনের লেখা পাঠানোর জন্য সবার প্রতি আহ্বান জানাই। লেখা সর্বজনকথায় দেওয়া ডাক ঠিকানায় কিংবা ই-মেইলে পাঠানো যাবে।

আমরা যখন এই সংখ্যার কাজ করছি, তখন দেশে ও বিশ্বের আরো বহু দেশে অস্থিরতা চলছে। এগুলোর পেছনে বিভিন্ন কারণ আছে। কোথাও সাম্রাজ্যবাদী আগ্রাসন, কোথাও সাম্প্রদায়িক জাতিগত বিভেদের রাজনীতির আধিপত্য, কোথাও লুটেরো শাসকগোষ্ঠীর অগণতান্ত্রিকভাবে ক্ষমতা আঁকড়ে থাকার চেষ্টা, কোথাও অগণতান্ত্রিক শক্তির ক্ষমতা দখলের কোশল ইত্যাদি কারণে সর্বজনের জীবন বিপন্ন। বাংলাদেশে ৪ জানুয়ারি থেকে অবরোধ, সন্ত্রাস, সংঘাত, বোমা ও অগ্নিসংযোগে অচলাবস্থা চলছে। পেট্রোলবোমার আগুনে পুড়ে, সংঘাতে, পুলিশের গুলিতে ২২ জানুয়ারি পর্যন্ত ৩০ জনেরও বেশি মানুষ নিহত হয়েছে। অগ্নিদন্তসহ জখম হয়েছে আরো অনেকে। এর মধ্যে শিশুরাও আছে। কর্মহীনতা ও নিরাপত্তাহীনতায় দেশের মানুষ। ক্ষমতার দুর্বৃত্ত খেলায় দেশের বর্তমান ও ভবিষ্যৎ ক্ষতিবিক্ষত।

মানুষ ও প্রকৃতির প্রতি বৈরী হিংসা, বিদ্যে, সন্ত্রাস, বৈষম্য, নিপীড়ন, দখল, লুঝন, আধিপত্যের বিরুদ্ধে ধর্ম-বর্ণ-জাতি-নির্বিশেষে নিপীড়িত নারী-পুরুষের রাজনীতি ও শক্তির দুর্বলতাই এই পরিস্থিতি তৈরি করেছে, বাংলাদেশ ও বিশ্বকে বসবাসের অযোগ্য করে তুলছে। ‘সর্বজনকথা’ এই রাজনীতির চিন্তা ও শক্তি বিকাশের পক্ষে কাজ করতে অঙ্গীকারবদ্ধ।

আর ক’দিন পরই বাংলা সাহিত্যের খ্যাতিমান তিন কথাশিল্পী- শওকত আলী (১২ ফেব্রুয়ারি ১৯৩৬), হাসান আজিজুল হক (২ ফেব্রুয়ারি ১৯৩৯) এবং আকালমৃত্যুর শিকার আখতারুজ্জামান ইলিয়াসের (১২ ফেব্রুয়ারি ১৯৪৩) জন্মদিন। এ বছর পালিত হচ্ছে বাংলাদেশের চারকলা জগতের প্রাণ জয়নুল আবেদিনের জন্মশতবার্ষিকী। তাঁদের সবার প্রতি আমাদের গভীর শ্রদ্ধা জানাই।